

MAMMA D'ORU¹¹

Mamma di lu me cori, Mamma mia,
Mamma ti pensu spissu ogni momentu;
tutti li figghi Toi pinsamu a Tia,
quant'era beddu lu To sentimentu!
Tu ni purtasti nta la giusta via,
nni dasti onestu lu To 'mparamentu;
ora fasulla la rota firrià,
a la riversa, sdisordinamentu.

Tu fusti brava pi fina a la morti,
lu ponnu diri cu Ti canuscìa,
lu ponnu diri chiaru a vuci forti:
eri Mamma di 'ntressu e pulizia!
Pani e cipudda e spissu favi cotti,
lu pani cu la tessera s'avìa
e Tu, Mammuzza, ni davi cunforti,
comu putivi fari, Mamma mia!

Mamma 'ntrissusa, Mamma vigilantanti,
nun ripusavi né ghiornu né notti;

¹¹ Pubblicata nel numero unico di poesia "Poeta Anch'io" del maggio 1988 in occasione del 3° Recital dei Poeti Busetani; 2[^] classificata al 1° Premio di Poesia e Narrativa ENDAS - Trapani 1997.

me patri 'n guerra comu tanti e tanti,
l'annu quinnici fu ssa mala sorti.
Niatri picciriddi tutti quanti,
mezzu l'eclissi e âtri cosi storti
e Tu, Mammuzza d'oru cucciulanti,
stintavi una cuvata di aciddotti.

Mamma, comu Ti pozzu mai scurdari,
Mamma, mi veni 'n sonnu, pensu a Tia:
facivi ad ogni cosa sparagnari
quantu la casa nostra 'un si pirdìa;
li robbi vecchi facivi durari,
li tapizzavi Tu, Mammuzza mia,
sempri puliti ni facivi stari,
luntanu di la fami e caiurdia.

Fici sincera la me puisia,
parlavi onestu, verità riali;
me Mamma ni 'nsgnau la giusta via,
Mamma, fusti na Mamma mondiali!
Ascurtatura, nun dicu bugìa,
parlu sinceru finu a la finali.
Un baciù, ciau tisoru, Mamma mia,
Ti liggivi la vita naturali.

LU SUPERBU MALIGNU

L'omu chi vugghi prestu 'un vali a nenti,
lu dicu a vuci forti 'n mezzu a tanti;
è un quararu di lanna trasparenti,
ogni musca ci pari un liafanti!
Sfigura in sucità 'n mezzu la genti,
ancora havi difetti chiù 'mpurtanti;
falsu, 'mprisusu, tristu e pripurenti
'nsina chi ci arrinesci tira avanti!
L'omu dabbeni p' 'un si ruvinari
tagghia la corda e nun ci havi da fari!

Buseto Palizzolo, 29 gennaio 1986

A LA ME CASA PATERNA

Musa, tisoru, forti mia adurata,
duni tanti vantaggi a la me vita;
si' sempri di cuntinu ricircata,
pi tuttu l'universu si' sintita.
Musa, troppu cu mia si' affiziunata,
forsi mi squatri li manu e li dita;
nta la me manu manca c'è stampata
virtù pi natura applaudita.

Mentri la me mamma era in vita
passava li jornati affaticata;
nui na famigghia grossa riunita,
novi li figghi a forma di ciuccata.
Màsculi ottu tutti a fila unita,
la fimmina fu l'urtima scuvata;
jò si era jattu avìa la calamita,
settimu figghiu, chissa è la sunata.

Dicu la cosa senza esagirata:
di patri e mamma mia vogghiu parlari,
dicu la virità senza truccata,
pòpulu mi putiti giudicari.
Chi bedda famigghia urdinata,
me patri ni 'nsignava a travagghiari;

sempri d'accordu, tutti na purtata,
l'unioni la forza la fa fari.

Me patri e mamma mia sàppiru fari
cu l'aiutu di Diu, nostru Signuri;
diversi beni sàppiru acquistari
onestamenti cu li soi suduri.
Ddi tempi si trattava di zappari,
nun c'era motozappa, né tratturi;
àutri mezzi 'un si putìa truvàri,
a manu si mitìa lu lavuri.

Oh quantu sacrifici e li suduri,
particulari nta la staciunata;
un jornu nta giugnu, a 'i siriciuri,
si mitìa sempri tutta la iurnata.
Lu chiù tintu ci jia lu liaturi
suratu sempri a cammisa vagnata;
jò vi lu giuru, a palora di onuri,
la vita nostra fu sacrificata.

Povera mamma mia, sempri affannata,
unnici tutta la nostra famigghia;
spissu travagghiava la nuttata,
la farina spartìa cu la canigghia.

Lu mulinaru la facia ammiscata nenti c'era di fari maravigghia.

Lu mulinaru la facia ammiscata,
nenti c'era di fari maravigghia,
ora tutta la vita è canciata:
la muggheri fa la bedda figghia!

SICILIA¹²

Sicilia, si' bedda di natura,
particulari porti la bannera;
tu si' ricca di frutta e di virdura,
ricca di suli e aria sincera.
Tu si' rigina di l'agricultura,
lu primu suli di la primavera;
tu si' la matri di villiggiatura:
ogn'annu di turisti c'è la fera!
Pi tuttu lu munnu si' un tisoru:
tu sula si' chiamata "Conca d'oru!"

¹² Pubblicata nell'Antologia Poetica del Gruppo San Michele - agosto 1985

TINTU CU È MORTU NTA UN CORI DI NÀUTRU¹³

Un succi dissi a un jattu na jurnata:

“Picchè si misu a la posta pi mia?” .

Lu succi, nta un pirtusu di pirnata,
si scantava e nèsciri ‘un vulia!

Lu jattu prontu, jornu e la nuttata,
aspittava chi lu succi niscìa,
ma lu succi capiu la mappiata:
dintra ddu bucu chiù dintra trasìa!

Mentri lu succi pitittu facià

chì nun manciava du’ jorna e du’ notti,

lu jattu cancia postu e si cantìa:

fici a lu succi trarimentu forti.

Lu succi affaccia e jattu chiù ‘un viria,

nesci affamatu pi so mala morti:

a lampu lu jattu ci scattìa

e fa lu succi la so mala sorti.

Perciò si mi capiti, ascurtatura,

tintu cu’ havi lu malu pinseri;

¹³ Pubblicata nel numero unico di poesia “Poeta Anch’io” dell’aprile 1986 in occasione del 1° Recital dei Poeti Busetani.

prima di tuttu vinci la natura:
puru l'armali nun sunnu sinceri!
Semu diversi di tanti culura,
c'è farsità di tutti cantuneri;
lu munnu è tuttu chinu di 'mpustura:
chiaci la terra chi ni teni 'n peri!

‘UN TI VANTARI

Vinni la primavera ‘n terra e mari,
gòrinu armali e tutti li pirsuni;
lu ‘nvernu si cumencia alluntanari,
lu celu nettu senza nuvuluni.
Tutti l’aceddi mèttinu a cantari,
ognunu canta li megghiu canzuni,
ma c’è ‘n aceddu chiù particolari:
sfida a cantari lu calannaruni!

St’acidduzzu si chiama rusignolu,
lu cantu d’iddu è beddu, pi cuscenza,
cu’ passa di la strata o d’u violu,
a sèntilu cantari attenta e penza.
Iddu ‘un si viri mai, lu farfantolu,
cu nuddu aceddu pigghia canuscenza;
difficili di villu o fermu o a volu:
si sta ammacchiatu e ‘un duna cunfirenza!

Jò di l’aceddi sentu la friquenza,
staiu ‘n campagna e li sentu cantari,
lu cardidduzzu canta a prifirenza:
è puru bravu chi si fa attintari!
Lu merlu duna puru pricidenza,
si po puru a la gara prisintari,

TRATTATI XI

ma lu calannaruni esti ‘n partenza:
st’attentu, rusignolu, ‘un ti vantari!

Su’ du’ voti, ti dicu ‘un ti vantari,
t’avvertu, tu lu sai, ti vogghiu beni,
tu ‘un poi sapiri soccu poi truvati,
megghiu parlari picca, ti cummeni.
Cantati tutti e tu lassa cantari,
la mmiria e la superbia su’ vileni;
si tu pi ‘mpegnu lu voi superari,
viri: “Cu tuttu voli nenti ottenti!”.

Ma lu calannaruni nun s’avanta:
‘n mezzu l’àutri aceddi sona e canta!

ZITATA MUDERNA¹⁴

Na crapa licca sciota nta un jardinu
dici lu jardinaru: “‘Un tocca nenti!”.
Jò nun lu criu - Settimu Pippinu -
chi focu e la benzina nun accenti,
e mancu criu un gattu malantrinu
viri lu succi e un s’ammola li renti,
lu stessu ‘un criu chi du’ fidanzati
niscennu sulì ‘un fannu vastasati!

Paremu tutti bravi a l’apparenza,
dimustramu rispettu e fratillanza;
simbrassi aviri netta la cuscenza
di trattari cu tèrmini e crianza,
mentri lu sensu pi ‘intentu ni penza
superba, falsità, forti ‘gnuranza.
Sugnu sicuru su’ la spirienza:
avemu tutti falsa la valanza!

La crapa sciota fici un gran ‘ssassinu:
ha’ ruvinatu tuttu lu jardinu!

¹⁴ Pubblicata nell’Antologia Poetica del Gruppo San Michele - settembre 1986.

BUSETU

Busetu beddu di tutti 'i latati,
si onestu fina a l'ugnu di lu peri;
o Diu, l'avemu tutti li piccati:
supra sta terra sbagliari succeri!
ma tu, modestu di l'antichitati,
'n mezzu la sucità si un cavalieri.
Le me' palori 'un sarannu sbagliati:
beddu lu vinu e beddu lu biccheri!

PUISIA DI RIALTÀ

Nuddu si po avantari nta stu munnu,
di beni o mali li cosi si sannu,
si dici: “C’è cu’ nata e cu’ va ‘n funnu”,
c’è puru cu’ lu voli lu malannu”.
Jò fina a st’ura lottu e ‘un mi cunfunnu,
cercu di fari beni, ‘un fari dannu;
si Diu mi chiama onestu ci rispunnu,
ci dicu: “Campu senza tantu ingannu”.

Lu munnu è sempri cu’ chianci e cu’ riri:
mali nun fari, paura ‘un aviri!

RISPOSTA A BERTU CRISCENTI
chi mi cinsura chi travagghiu ancora a 73 anni.
Palora esatta.

Ciau ciau Bertu Criscenti,
omu bravu di buntà,
mi cinsuri onestamenti
chi travagghiu a sta ità.

Esti tutta virità,
è palora di cuscenza,
arrivannu a ssa ità
nun c'è chiù la risistenza.

Nun mi sentu na putenza,
sugnu riccu di saluti;
jò ti rugnu a cunfienza:
li me' forzi 'un su' pirduti!

Diu t'aiuta si t'aiuti,
s'un t'aiuti vai a falliri,
si nun paghi 'i contributi
ci su' spisi a mai finiri.

Caru Bertu, vogghiu diri,
la me musa nun s'avanta;
senza invidia e sospiri
zuccaru mai vasta bivanta.

La me musa sempri canta,
lotta sempri agghiorna e scura,
jò nun fazzu propacanta,
vinci sempri la natura.

Cu avi robba e la trascura,
comu fici Dongiuvanni,
morsi scarsu addirittura
senza causi e mutanni.

19.02.1986

A CASTEDDAMMARI

Casteddammari, si' nta na Batìa,
l'essinziali nun ti manca nenti;
lu mari sempri 'n facci ti brillia
e la muntagna dà ossìginu a la genti.
Casteddammari, ci fai simpatia
puru a lu nostru Diu onniputenti.
Oggi ti fazzu jò sta puisìa,
elogi naturali e cumplimenti.

Nun è sistema meu di esagerari:
tu si' lu specchiu, celu terra e mari!



Da sinistra: Francesca Fanara, moglie di Giuseppe Settimo Scuderi;
fratello Vito e moglie; Giuseppe Settimo Scuderi.